

Hää' UMA PIDO sõbra'!

Pidopäiv on seos kõrras läbi - oll uma ja uhkõ, rõõmsa ja illos. Saadami veidü teedüst pido "nänni", pia valmis saava DVD ja iinuutva kolmanda Uma Pido kottalõ.

Et hääd miilt ja mõnsat mälestüst pidost meelen pitä' om võimalik hindäle saia' Uma Pido atribuutikat vai nänni :)

Kinkal huvvi suuvi om, saa Võro Instituudist

- osta väega kõrralikku ja ihosõbralikku, pido lõugahusõ ja lõõdsakiräga kirätüt linast Uma Pido hamõt
Uma Pido hamõ – 250 kruuni
- saia' hindäle Uma Pido plakatiid (plakatiid saa nätä' Uma Pido kodolehe pääl uudissidõ lingi alt)
Flaieri' A5 – massulda
Plakati' A4 – massulda
Plakati' A2 - massulda
Suur bussipiatusõ plakat (oll üllen õnnõ Võrol, 1,2 x 1,7 m) - 175 kruuni. Tõõlidsi kollektсионääre sian om tego rariteetse mälestüsa'aga, üle terve ilma pakmisõl õnnõ 10 tükkü!
- hanki väärmilidses mälestüses **Uma Pido käepael hinnaga 3 kr**, miä om tükükene kuvvõst põimit kilomitrest.
- osta **kavavihku 15 kruuni tk.** Kavavihun omma' kõigi laulõ sõna', tähtsämb teedüs olnu pido kottalõ ja muido hääd lugõmist.

Pakminõ ei saa' vanas, a kõik nimetedü asju om sääne hulk, et nä võiva' otsa saia'!

Võro Instituut om vallalõ E-R, 9.00-17-00

Tulõman om ka duubel-DVD olnu pidost, miä saa valmis suvõl!

Nigu minevagi kõrd, om üts plaat täüs pido pääkontsõrti ja tõsõ pääl kõik muu, miä om kõüdetü pido ja timä tegemiisiga. **Kõik pidol käünü kollektiivi' saava' üte komplekti massulda teno Piiriveere Liidri tugõmisõlõ!**

Kiä aga taht hindäle kodo peris uma eksemplari, saa tuud kimmähe osta. Hind om kõüdüssen tellitava tiraažiga, a olõ-i kimmähe suurõmb ku 150 kruuni, arvada õks vähämb :)

Et kõrraldaja' mõistassi telli võimaligult parra koguse DVD-sid, panõmi parla kirja kimmit tahtjit, kinkalõ ka parõmba hinna teemi. Pallõmi hindä kimmäst ostmisõ soovist teedä' anda: vaia om teedä' nimme, meiliaadressi, telefoni ja mitu tükkü telliti!

Kolmas Uma Pido tulõ 1. juunil 2013!

Kõrraldaja' omma' rõõmsa', et tõnõ Uma Pido tull nii kipõstõ päält edimäst - vaihõlõ jäi õnnõ üts aastak, tuu tähendäs, et edimäne pido oll 2008. aastagal ja tõnõ no' seo aastak. **No' otsustõdi vaiht jättä kats aastakka ja tetä' vahtsõnõ pido 2013. aastaga 1. juunil ja muidoki Võrol Kubija lauluväljaku pääl.**

Mille jääs vaihõlõ kats aastakka? Kõrraldajidõ suuv om tetä' pido võimaligult hää. Tuu taht süämeest tegemist ja aigu... Sügüse kutsutas kimmähe kokko tsõõriklaud, et arota' kolmanda pido kõrraldust ja panda' kokko pido toimkund.

Kimmähe jää-i kats aastakka vaihõpääll Umast Pidost tühäs... mi saami kokko ja teemi pido-utmist suurõmbas, et sõs 2013. aastaga keväjä jäl' pidos valmis olla'! Viisi- ja värsisepä' võiva' hinnäst valmis panda' - tulõ konkurssõ! Laulusõbra' uutku kontsõrtõ! Ja nakkaja' inemise pakku vällä, miä viil olla' võissi...

Kõik mõttõ' kõüdüssen vahtsõ pidoga omma' oodõtu! Mändsit laulõ võissi pidol laulda'? Mändsit laulõ võissi vahtsõst laulda'? Miä võissi kõrraldusõn tõistõ olla'? Kas teil om hullõ mõttit vahtsidõ projekte kottalõ kõüdüssen Uma Pidoga? Tulõtagõ miilde kasvai mihi mõtsast ja naisi nurmõlt ja kunnakuurõ...

Uma Pio om mi kõiki uma pido! Pidot saimi hinnäst tunda' ütänä, hoitku meid no' kuun ka vahtsõ pido uutminõ!

Kõrraldajidõ nimel,

Triinu Ojar
Võro Selts VKKF
533 22 153
triinu.ojar@wi.werro.ee